

SKI



Agl duel: Leo Rönz, SC Bavregn a Lorenzo Pavioni, SC San Bernardino. FOTOS SKICLUB TAMBO SPLÜGEN

Slalom paralel da Spleia

Dafartànt c'igl targeva egn vent frestg anuntgeava la marcànta frunt da fardaglia segl Ölt da Tanatz, ragieva egn'atmosfera ruas-sevla a la partenza digl slalom paralel da sonda passada a Spleia. Las 93 competuras a competiturs digls clubs da skiünzs d'Avras, Bavregn, Mantogna, San Bernardino, Tambo Spleia a da l'Uniùn da Sport Tumpriv en s'antupos suainter egn'interrupziùn d'egn on puspe par samasirar an otg categorieas a caschùn da quella cursa tradiziunala publica.

Cursas competitivas

A l'antscheata – alura ànc da la ple beal'ora – àn gieu liac la cursa a tains. Igl 16 ple spearts da mintga categoria en vagnieus mess segl tablo ad àn gieu da cumpeter pigl otgavel final. Sen la pista, c'era preparada da maniera parfetga, àni alura samasiro an duels directs las atletas ad igls atlets. Tgi ca leva rivar agl final, veva da dumagnear mintga duel da que slalom. Par c'igl deti betga victorgias casualas, e'gl vagnieu fatg igls duels finals a caschùn da duas cursas alternànd mintgame la pista cotschna a blaua. Igl finalists vevan peia d'absolver an tut sis cursas competitivas.

Victura digl gi e davantada *Antonia Spörri*, la quala à dumagnieu *Lara Fontana* an las cursas finalas. Igl victur digls umens sac-loma *Maurin Michael*. El e sto me 0,32 ple speart ca *Mattia Ballarin*. Dantànt eara l'ora gea samidada e e davantada criua.

Suainter las cursas e lura ear betga vagnida a la curta la cumpagneia an l'ustreia a la staziùn a val, noua ca la rangaziùn à gieu liac. Las blearas fatschas vantirevlas àn musso egn'eada daple, quàn anavànt c'igl angaschamaint cuminevel digl Skiclubs Tambo Spleia, da l'US Tumpriv a digl Sci Club San Bernardino promova tschafen a plascher pigl sport an la Regiùn Viamala. (cdm/bt)

Ulteriuras infurmaziùns a la classificaziùn en da vaser sen la pagina [sctambospluegen.ch](#).



Enrico Fromm, SC Bavregn a Gian Marco Strub, SC Tambo Spleia a caschùn digl otgavel final.



Damas (da san.): Alice Trepp 4.; Claudia Buchli 3.; la victura digl gi **Antonia Spörri 1. a Lara Fontana 2.**



Umens (da san.): Enrico Fromm 4.; Francesco Stern 3.; igl victur digl gi **Maurin Michael 1. a Mattia Ballarin 2.**

«Ussa ve jou daple tains par turas da skis a far lena»

Igl Guido Conrad (60) bandüna las Ovras electricas Ragn posteriur (KHR) suainter 18 ons sco directur. An quels ons e el sto igl ple davànt – igl tgiu da las Ovras electricas Ragn posteriur. Suainter tut an tut 30 ons tier la KHR cunstatescha igl Guido Conrad: «La forza d'aua e la petga prinzipala digl provedimaint electric svizer.»

STEFANIE ELSA/FMR

Par 30 ons à igl *Guido Conrad* s'identifitgieu cun las Ovras electricas Ragn posteriur. An que tains à el ear gieu la sfida d'easser directur – igl tgiu – da l'interpresa igls 18 passos. Ussa e'gl tains par egn nov tschancùn da sia veta ad el surdat la fegn da marz l'interpresa agls màns digl *Jürg Flückiger*.

FMR: *Agl 18 ons ca Vos eassas sto directur da las Ovras Electricas Ragn posteriur (KHR) à siir samido blear. Tge e sto la ple grànda midada?*

Guido Conrad: La ple grànda midada e quella digl parsunal. Nus vagn forza me ple la measadad digls luvraints c'en stos angaschos par la KHR avànt 18 ons – dantànt e quegl egn prozess natiral, parquegl c'igl à do la midada da generaziùn. Ad ear schiglioc – l'antiera branscha da las ovras electricas à samidada, avànt eara la fiera d'energeia sen nivel local a nazional. Mo igl svilup anviers interpresas internaziunalas, gliez e sto egn sfida.

La KHR s'oda gea me par egn pintga part (var 15%) ad interpresas grischunas, agl cantùn Grischùn ad a vischmancas cumzessünaris. E quegl tanor Vos bien near mains bien?

Agl cantùn Grischùn ad igls vaschinadis s'odan anzemen 15%, a la Repower à ear ànc 6,5%. La KHR e egn buna ovra cun succzess, ascheia savess igl easser bien d'aver daple influenza prozontuala. Dantànt e'gl ear da cunsiderar la raspunsavladad c'ign porta cun daple cumpart.

Tge earan las ple gràndas sfidas par Vos sco directur?

La KHR e egn ovra cun 80 luvraints, grànds stabilimaints c'àn grànda prestaziùn – quels c'en an funcziùn, mobagn ear quels ord funcziùn. Igl prinzipal e d'observar la siretza digls luvraints cura c'els lavuran cun quels stabilimaints. Egn'otra sfida e la facultad da la KHR, cun egn miliarda e quegl egn valeta imensa. Blears projects en vagnieus ramplazos, parquegl c'ign sto adigna puspe renovar la substànza.

Gràndas investiziùns en vagnidas fatgas igls davos ons. Quàn «fita» e l'interpresa pigl avagnir?

L'interpresa e fita parquegl c'igls stabilimaints en an egn bün stat a la KHR à egn stupenta squadra – igls luvraints en da buna viglia a lavuran cun grànd angaschamaint. Nus vagn stabilimaints moderns ca funcziuneschan bagn – c'ign sto far pintgas adataziùns trànteraint, gliez e normal. Jou gess an relaziùn cun otras ovras eassan nus dirigiant an quella branscha.

Par la darschantada gl'on passo igl avust earan las auas gea fetg gràndas – cura dezi-dez Vos sco directur «ussa e fito – quegl e megna privlus?

Par egn darschantada en adigna blears luvraints an acziùn a l'amprema prioritad e la siretza da quels. A l'otra tgossa e c'egna darschantada e sco an egn bognera cura c'ign lascha puspe or l'aua. Plievgia e impurtànt par lavar or, mo sch'igl plova megna fearm alura safearma l'aua puspe anavos agl lai ad igl e nunpussevel c'igl lai da farmada vean vid – parquegl c'igl safearma puspe anavos agl lai.

An Svizra e la transfurmaziùn d'energeia sen roca – peia davent d'energeia atomara anviers energeia regenerabla. Tge rola gioja la forza d'aua pigl futur digl provedimaint d'energeia da la Svizra?



Igl Guido Conrad e sto directur da las Ovras Electricas digl Ragn posteriur par 18 ons.

Tanor me à la forza d'aua ear egn rola impurtanta, parquegl c'ign gudogna or da l'aua speart energeia, cun la quala ign sa produ-tgear electrizitad c'e alura disponibla pigls partgeas. La tecnolegia e betga me cumprovada, mobagn l'electrizzitad e ear disponibla «sen cumond». Parquegl e par me la forza d'aua la petga prinzipala digl provedimaint electric svizer. L'electrizzitad sto easser disponibla cura c'ign dovra ella.

Tier diferaintas ovras electricas dat igl la pussevladad d'angrandir las capacitads. Dat igl ear pussevladads tier la KHR?

Tge c'igl dat en pussevladads da transferir las reservas da stad an energeia pigl unviern. Da stad savess ign par exaimpel pumpar daple aua digl lai da farmada da Sufers an la Valle di Lei a cunquegl vessan'ign daple reservas pigl unviern. Tge c'e prest betga ple pussevel e da duvvar auas suplementaras, quellauas vignan duvradas d'ovras dad otras regiùns cunfinàntas – sco p.ex. las ovras da la Bargiaglia, igl «EWZ Mittelbünden», las ovras electricas da Zervreila a las ovras digl Misoc.

Agl cass da pliras ovras electricas agl cantùn Grischùn e igl return agl proprietari (Heimfall) actualmeing egn tema, respecti-

vameing egn cuntinuaziùn digls contracts existaints. Co veza quegl or tier la KHR?

Agl cass da la KHR en quels cuntracts valevels tocen gl'on 2042 – parquegl àn igls dascurs ànc betg antschie. Mo la KHR e egn cass spezial, parquegl ca l'ovra à egn partizipaziùn taliana da 20 % ad 80 % partizipaziùn svizra. Quegl e egn prozedura complexa, parquegl c'ign à da determinar la raspunsavladad trànter l'Italia, la Svizra, igl cantùn Grischùn ad igls vaschinadis partizipos.

Tge avantura e stada spezialmeing an morgia a Vos digl Voss tains tier la KHR?


Da quellauas dat igl blearas. La beala vart e igl succzess sco fatschenda cun la renovaziùn cumpleta digls 2017. Jou ve gieu l'anur da star igl ple davànt, mo sainza quella squadra cumpetenta fuss quegl betga sto pussevel. Jou s'identifitgesch cun la glieud a cun l'interpresa – cunquegl e'gl impurtant da ver büns luvraints. La vart pletost negativa e sch'ign sto prender cumgieu da luvraints activs a luvraints pensiunos c'en morts parve da egn malzogna – igl carstgàn davostier à adigna la ple grànda muntada.

Ussa bandünaz Vos l'interpresa. Succzeda quegl cun egn il riaint, cun egn il ca larma u forza tuts dus?

Par me e quegl tuts dus – parsunalmeing salegr jou sen quella nova part da la mia veta. Igl il cun larmas ve jou forza, parquegl ca jou bandün igls colavuratur. Jou ancanusch tuts cun num ad igl à do blears beals mumaints. Jou vess betga savieu far la mia lavur sainza la glieud. Tut igl oter se jou dar giou bagn, ear la grànda raspunsavladad. Ad jou ve dezi-dez da dar la fatschenda an oters màns, aschi gi ca jou se ànc sez prender quella dezi-dez dad ir.

Tge vean ign agl futur ad udir digl Guido Conrad, noua magna la veia?

Davent digl 1. d'avregl lavur jou independente meing a sund a disposiziùn par projects a cunzegl – egn peer mandats ve jou schon. Lotra part en cunzegls d'administraziùn, egn an la Turgovia, egn an la Surselva, ad alura quel da Viamala Turissem. A privat sund jou sen turas da skis near ved igl far lena.



La darschantada gl'on passo agl avust – cun auas gràndas.

FOTOS STEFANIE ELSA